

KORINHTUQ

Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, ² jowò hkanmó má nga-nhûng é Yhumsîng Yesuq Hkrisduq é myìng lé láng é bang eq rahá, chyoiyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

³ Nga-nhûng é Îwa Garai Gasang eq Yhumsîng Yesuq Hkrisduq chyáng mâ é jeju eq ngingón hkyô gi, nungmoq chyáng ru joq nyî sháng gaq ô.

Hkrisduq É Yanmai Wó É Jeju

⁴ Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri. ⁶ Haû gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haû mù, nga-nhûng é Yhumsîng Yesuq Hkrisduq dum htoq shit râ lé, nungmoq gyai myoqbyu láng nyi é u má, nungmoq gi, woi-nyí hkyô eq sêng é chyunghuq haí lé le

langhpyut kó râ a nghut. ⁸ Nga-nhông é Yhumsîng Yesuq Hkrisduq é buinyì má, nungmoq lé mara hûn râ hkyô a bò shoq, Hkrisduq gi, nungmoq lé, htáng shoq gíngtíng nhang nyì râ nghut lhê. ⁹ Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noquq Hpúng Má Gam Hkoq Lhûm É Hkyô

¹⁰ Gumang wuì ê, nungmoq hkaû má gam hkoq lhûm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyì sháng gaq, nungmoq lhunglhang bang rayuq eq rayuq byìn hpyé gohut huì nyì keq nghû, ngò, nungmoq lé, nga-nhông é Yhumsîng Yesuq Hkrisduq é myìng mai dúng tôngbán kat lhê. ¹¹ Ngá é gumang wuì ê, Hkloe é yhûm byù wuì gi, nungmoq hkaû má mabyoq htoq hkyô joq é lé, ngo lé hkyáng lo shit akô. ¹² Ngò haû su nghû taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é myìng mai wui-myhup hkâm yù kô é lhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵ nungmoq ó yuq le, ngá é myìng mai wui-myhup hkâm yù bê nghû a wó taí é nghut mù, ngò, Garai lé jeju hkyâ-ôn lhê. ¹⁶ (Stehpana é yhumbyù wuì lé le, ngò

wui-myhup hkám byî é nghut lhê, haû mai lai luí gotû ó lé hkám byî záng ashî laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang dông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garai É A-tsam Eq Hpaqchyî Byéng-yá Gi, Hkrisduq

¹⁸ Hkâsu mù gâ le, tapzing má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gâ le, Chyúmdang má kê tô é gi, "Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."✧

ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasâng é hpaqchyî byéng-yá mai ga jang, mingkan zo wuí gi, yhumsing é hpaqchyî byéng-yá dông mai Garai Gasang lé a wó sé kê é yanmai, danggang gâ pyám byi kê é mungdang lé hko kyô é dông lumjing

✧ **1:19** Esai 29:14

bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhang, ngamoq gi, tapzîng má jén sat huî é Hkrisduq é hkyô lé hko kyô lhê. Haû gi, Yudaq byu pê é matú myit leqbat jowò eq tûngbaù pê é matú danggang dut byuq ri. ²⁴ Nghut kôlhang, Garai Gasâng eq ji yù huî é Yudaq byu pé eq Grik byu pê é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wuî ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wuî é nyi yap a-tsâng dông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê. ²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê. ²⁸ Yhang gi, mingkân eq ahkyak tô é lé lhoq htên pyám râ matú, haî a nghut é lé le, mingkan mâ é aróng a bo é eq wú tiq pyám huî é lé le, hkyin yu é nghut lhê. ²⁹ Haû gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyî bekô nghut ri; Hkrisduq gi, nga-nhûng é matú, Garai Gasâng

chyáng mâ é hpaqchyî byéng-yá dut bê nghut ri. Haû gi, nga-nhûng é dingmán hkyô, chyoiyúng hkyô eq hkyi yù hkyô nghut ri. ³¹ Haû mù luí, "Gumrong é sù gi, haû Yhumsîng má gumrông sháng gaq." ✧ ga kê tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wuì ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kûng é eq hpaqchyî byéng-yá mó bo é dông lé é a nghut. ² Hkâsu mù gâ le, ngò, nungmoq eq rahá nyí é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myhî pyám râ nghû myit hpyit yû bê nghut lhê. ³ Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵ nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dîng bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huí é shí pyat mâ é zaú wuì é hpaqchyî byéng-yá dông kúm a nghut. ⁷ Ngamoq taí é gi, haq tô é eq, ahkyíng nghu é lháng a joq shi mai nga-nhûng é hpungwup shingkâng é matú Garai Gasang tô to byí é

✧ 1:31 Yer 9:24

hpaqchyî byéng-yá nghut é, Garai Gasâng é zaú tô é hpaqchyî byéng-yá lé taí é ru nghut lhê. ⁸ Shí pyat lhê é zau wuí gi, hpaqchyî byéng-yá haú lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shing kang bo é Yhumsîng lé tapzîng má jén sat pyám kó râ a nghut. ⁹ Nghut kôlháng, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."✧

ga kê tô é eq rajung za nghut ri. ¹⁰ Nghut kôlháng, Garai Gasang gi, haú hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haú gi, jung hkgámó lé ho gôn wú é nghut lui, Garai Gasâng é zaú tô é hkyô lé lháng ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byi to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. ¹³ Haú mù lui, ngamoq gi, waxâng zô wui é hpaqchyî byéng-yá èq mhoq byi é dang dông taí é a nghut, Garaí é Woi-nyí èq mhoq byi é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lhê. ¹⁴ Haú Woi-nyí lé a wó é sù gi, Garai Gasâng é Woi-nyí mai

✧ 2:9 Esai 64:4

lo é hkyô pé lé a hap yu é nghut lhê; haî mù gà le, haú pé gi, yhâng é matú ngok é hkyô nghut lui, woi-nyí hkyô đông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lunglhang lé wó jéyáng lhê, nghut kôlhang, yhang lé kúm gi, ó yuq eq le wó jéyáng é a nghut. ¹⁶ Chyúmdang má,
 "Hkâsu mù gà le, ó yuq wá, haú Yhumsing é myit lé sé mù, Yhang lé wó mhoqshit wú é lú?"[✧]
 ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noquq Hpúng Má Gam Hkoq Lhâm É Hkyô

¹ Gumang wuì ê, hí hkûn, ngò gi, nungmoq lé, Woi-nyí eq sêng é bang lé đông wó taî é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taî wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuî lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashî kó nghut ri. Hkâsu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuì su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng

✧ **2:16** Esai 40:13 * **3:2** Nungmoq lé naú byi huq é, gà é gi, lui é hkyô pé lé hí mhoq byí é lé gà lhê.

lhê." ga taî nyi bùm kô é nghut jáng, nungmoq gi, mingkan zo wuî nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaî é dui-nhâng zoshâng za nghut luî, ó le ó lé, haû Yhumsing èq hun tô é muzó eq rajung za wùn waq é nghut luî, nungmoq gi, ngá-nhik dông mai wó lumjǐng kô é ru nghut lhê.

⁶ Ngò gi, gabú danglù amyui lé hô kat, Apolo gi, wuî hpyun byi, nghut kôlhang, yuq kô lò nhang é gi, Garaî Gasang za ru nghut lhê. ⁷ Haû mù, amyui hô kat sù eq wuî hpyun byi sù gi, ahkyak mó a nghut, yuq kô lò nhang é Garaî Gasang za sheq ahkyak ru nghut lhê. ⁸ Amyui hô kat sù eq wuî hpyun byi su nhik myoqbyu tô é hkyô gi, rajung za nghut ri; nghut kôlhang, yhumsǐng shikut é eq rajung za, ó le ô é shigyau chyunhuq wó yû kó râ nghut lhê. ⁹ Hkâsu mù gâ le, ngamoq gi, Garaî Gasâng é mù zui luzúm wuî nghut lhê; nungmoq gi, Garaî Gasâng é yò, Garaî Gasâng é yhûm nghut nyi akô.

¹⁰ Garaî Gasang, ngo lé byi to bê jeju eq rajung za, yhûm saí kung sù rayuq dông, ngò gi, yhûm apûn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhang, yuq hkanmó gi, yhumsǐng saí é má rago sidiq râ lhê. ¹¹ Hkâsu mù gâ le, hi to gù nghut é, Yesuq Hkrisduq nghu é yhûm apûn awang mai lai luî, ó yuq le, gotû yhûm apûn awang lé wó saí é a nghut.

¹² Yhûm apûn awang hau é ahtoq má, hǐng, ngùn, hpaudap luqgok pé, sik, mhan, hkowá pé lé chûng mù saí jat kô é nghut jáng, ¹³ yuq hkanmó é muzó hkâsu nghut é hkyô lé lhoq htoq shit é hui râ nghut lhê. Haî mù luî gâ le, haû Yesuq é Buinyi gi, haû lé

byu-myàng nhâng mù, haû buinyì lé gi, myî èq lhoq htoq shit râ nghut lhê. Haû myi gi, yuq hkgangmó saî é muzó hkasû é nghut é lé chyâm râ nghut lhê.

¹⁴ Rayuq yuq saî é yhûm gi, ru gîng nyi é nghut jáng, haú yuq gi, yhang é shigyaú chyunghuq wó yû râ nghut lhê. ¹⁵ Nghut kôhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôhang, myishâm mai wó lut é byù su dut râ nghut lhê.

¹⁶ Nungmoq gi, Garai Gasâng é noqkuq yhûm nghut luî, Garai Gasâng é Woi-nyí gi, nungmoq má lúng nyi bê hkyô lé a sé kó lúh? ¹⁷ Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haú yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

¹⁸ Nungmoq gi, yhumsing gùng yhumsîng hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng dông hpaqchyî byéng-yá bò sù ga myit é nghut jáng, hpaqchyî byéng-yá akying bò sù wó dut sháng gaq, yhang gi, a-ngok sù dut râ lhê. ¹⁹ Hkâsu mù gâ le, mingkan shí mâ é hpaqchyî byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyî byéng-yá bò bang lé, yhangmoq é hpaqchyî má yhang myí to nhang ri."✧ ga kê tô é eq rajung za nghut ri. ²⁰ Hau htoq agó, "Haû Yhumsîng gi, hpaqchyî byéng-yá bò bang myit é hkyô pé akôm nghut é lé sê lhê."✧ ga le kê tô ri. ²¹ Haû mù luî, ó yuq le, byù eq sêng é hkyô má gyáng é dang a tai

kó sháng gaq! Lhunglhang gi, nungmoq é chyat nghut lhê. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng mâ é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haû mù luí, byu pé gi, ngamoq lé, Hkrisduq é dui-nhang zoshang wui đông eq Garai Gasâng é zaú tô é hkyô pé lé tại pyô râ matú ap byi tô é hui bang đông sôn yù râ lhê. ² Haú đông nghut jang, ap byi tô é hui bang gi, yhumsing lhumzui hkyô lé saksé shit râ dut lhê. ³ Nungmoq eq nghut nghut, waxang zô wui é tarâ rùng mai nghut nghut, ngo lé jéyang kô le, ngá é matú atiq azo za nghut lhê; gè gè ga jang, ngá gung ngò lhang a jéyang é nghut lhê. ⁴ Haí mù gâ le, ngá gung ngò mara a bò bôn é nghut kôlhang, haû gi, ngo lé wó lhoq sân-yung byi é a nghut. Ngo lé jéyang é sù gi, haû Yhumsing nghut lhê. ⁵ Haû mù, masat tô é ahkying a jé shimá haí lé le a jéyang é za, haû Yhumsing jé lé shoq, láng nyi keq. Yhang gi, mauchut hkaû má haq tô é pé lé byu-myàng nhang mù, byu pê é myit nhiklum má lúng é hkyô lé lhoq htoq shit râ nghut lhê. Haú hkun, yuq hkgámó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶ Gumang wui ê, ngò gi, "Kâ tô é gû mai hkâlai." gâ é sanghkyang é lichyúm lé, ngamoq chyáng mai nungmoq wó mhoq yú sháng gaq nghu, nungmoq

é akyu é matú, nè eq Apolo má haú pé lé yù mù dangtú kut é nghut lhê. Haú hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaî shoq kut lhê lhú? Nàng hap yu é a nghut le gi, wó râ lhú? Nàng, hap yu é nghut le gi, a hap yu é dông haî mù nghutbûn nyi lhê lhú?

⁸ Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, nè hkâ-í yhang ô nau nyi lhê ô! ⁹ Nghut kôlhang, sat râ matú doqdan huî é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, nè wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kûn jung dông dut nhang é huî nyi gù bê nghut lhê. ¹⁰ Ngamoq gi, Hkrisduq é yanmai ngok é bang dông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang dông dut bekô nhung! Ngamoq gi, wum nyhôm é bang dông sôn yu é hui kôlhang, nungmoq kúm gi, wúm bo é bang dông dut bekô nhung! Nungmoq gi, hkunggâ é huî akô; ngamoq kúm gi, hkunggâ é a hui nhung! ¹¹ Shí hkyíng shí u jé shoq, ngamoq gi, zòmut wuìshit huî é, mebu ajeq amyhâ dut huî é, nhuq bat huî é, yhumsing é nyi jowò a wó é bang nghut nyi lhê. ¹² Ngamoq gi, yhumsing loq èq yhang mù zui wum kat nyi lhê. Ngamoq gi, nhîng pyâm é hui jáng, shimân byi,

zing-rî é hui jáng, jân pyám kut lhê. ¹³ Ngamoq gi, lumù gansang é hui jáng, dang ngón dang nguî tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huî nyi lhê.

¹⁴ Ngò gi, nungmoq lé hoq lhoq hpu râ matú haú pé lé kê é a nghut, ngá é chytđap zo wuî lé dông lhoq pûn kying râ matú ru nghut lhê. ¹⁵ Nungmoq gi, Hkrisđuq má mhoqshit bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haú gabú danglù dông mai, Hkrisđuq Yesuq má nungmoq é îwa dut é nghut lhê. ¹⁶ Haú mù luî, ngò kut é su cháng keq nghû, ngò, nungmoq lé lung kat lhê. ¹⁷ Hau é yanmai, ngò gi, haú Yhumsîng má lhumsuzi sù nghut é, ngò chytđap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisđuq Yesuq mâ é ngá é asak ðuî hkyô lé, jowò hkangmó mâ é noqkuq hpúng hkangmó lé ngò mhoq byî é eq rajung za, nungmoq lé lhoq pun byi râ nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbûn byuq bekô nghut ri. ¹⁹ Nghut kôlhang, haú Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haú hkûn, ngò gi, nghutbûn é byù haú bang haî taî é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. ²⁰ Hkâsu mù gâ le, Garai Gasâng é mingdán gi, taî é dang má bo é a nghut, a-tsam má sheq ru nghut lhê. ²¹ Nungmoq hká dông ô nau akô lú? Ngò gi, nungmoq chyáng, nuichûm hkat

èq, a nghut jáng, chyitdap é eq nú-nhâm é myit mai lé lô ra râ lúh?

5

Ashop É Đông Gungsho Zùm Yap É Hkyô Kut É Sû Lé Lhoq Htoq Pyâm Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak taí hù lò bekô; haú gi, a lumjúng bãng chyáng lhang a dut wú é hkyô nghut é, yuqgè rayuq gi, yhângwâ é myiwe eq nyi zô lhum nyi é hkyô nghut ri. ² Nghut kôle, nungmoq gi, nghutbun nyi bum akô nhung! Haú đông a nghut é za, nungmoq gi, yón é myit tân shit mù, haú su kut é byù lé, nungmoq é hpúng mai lhoq htoq pyâm le, a gè kó lúh? ³ Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyi luí, gungdu jé nyi tô é đông mai, haú hkyô kut é sù lé jéyáng doqdan gù nghut lhê. ⁴ Nungmoq gi, nga-nhông é Yhumsing Yesuq é mying mai zup zing mù, ngá é i-myit gi, nungmoq eq rahá nghut nyi luí, nga-nhông é Yhumsing Yesuq é a-tsam le, nungmoq eq rahá nghut nyi é hkún, ⁵ byù haú yuq lé, Tsadán é loq má ap byi pyâm keq.* Haú jáng, Yhumsing é buinyi má, yhâng é woi-nyí gi, hkyi yu é hui râ matú, yhâng é yubak gungsho gi, lhoq htên pyâm é hui râ nghut lhê.

* **5:5** Tsadán é loq má ap byi pyâm keq gá é gi, hpúng byù wui eq a zùm yap nhâng lo râ lé taí é nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lúh? ⁷ Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhông é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸ Haú mù luí, nga-nhúng gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poí haú lé kut nyi sháng.

⁹ Ashop é đông gungsho zùm yap é bang eq hkâzûm kó nghû, ngò, nungmoq lé, ngá é laiká má kê kat byi bê nghut lhê. ¹⁰ Nghut kôlhang, mingkan shi eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haú su ru nghut le gi, mingkan htoq shi mai nungmoq htoq ló byuq ra kô râ nghut lhê. ¹¹ Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuí, ngò, nungmoq lé kê kat nau é nghut lhê. Haú sù é byu eq gi, rahá lhang hkâzo kó.

¹² Haú noqkuq hpúng shinggan mâ é bang lé jéyáng râ gi, ngò eq hai sêng lhê lúh? Nghut kôlhang, hpúng ahkaú mâ é bang lé nungmoq jéyáng râ dut

† **5:6** Mún gâ é gi, yubak mara lé tái nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk sai kô é nghut lhê.

lhê. ¹³ Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haû agè agaú é sù lé, nungmoq chyáng mai lhoq htoq pyám keq."✧ gâ tô ri.

6

Lumjینگ Băng Hkaû Má Jéyáng Lhûm É Hkyô

¹ Nungmoq mâ é rayuq yuq gi, gumang góyuq eq dang-rhâng lhûm tô é nghut jáng, haû hkyô lé jéyáng nhâng râ matú, haû sân-yúng băng é hí má taí râ malaí, Garai a wó băng é hí má wám taí râ lú? ² Haû sân-yúng bang gi, mingkan lé jéyáng râ nghut é hkyô lé, nungmoq a sé kó lú? Nungmoq gi, mingkan lé jéyáng râ bang nghut kôle nhîng, tiq é mù pé lé wó jéyáng é bang a nghut kó lú? ³ Nganhúng gi, maumâng pé lé jéyáng râ nghut é hkyô lé, nungmoq a sé kô lú? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô! ⁴ Haû mù luí, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kô râ lú? ⁵ Ngò, haû su nghû taí é gi, nungmoq lé hoq hpu nhâng râ matú nghut lhê. Lumjینگ băng chyáng dang-rhâng lhûm é hkyô lé wó jéyáng râ hpaqchyí luq shoq bo é byù, nungmoq chyáng rayuq lhang a nyì dut kô râ lú? ⁶ Nghut kôlhang, nungmoq gi, gumang yhangchang rayuq eq rayuq, a lumjینگ băng é hí má lhang rûng shok lhum akô nhung!

⁷ Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lhang rû ge lhê a nghut kô lú?

✧ 5:13 Tarâ Pun 17:7

Mhaú zô é huí le lháng rû gè lhê a nghut kô lú? ⁸ Nghut kôle, nungmoq yhang gi, mhaú zo kô é eq shut kô é nghut lúí, haú gi, nungmoq é gumang wui lé kut é nghut lhê.

⁹ Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyi kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyi zô lhum é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut. ¹¹ Nungmoq mâ é ra-am gi, haú su kut kô é bang nghut akô. Nghut kôlhang, nungmoq gi, nga-nhông é Garai Gasâng é Woi-nyí eq Yhumsing Yesuq Hkrisduq é myìng mai, mara hkyut san byí é, lhoq sân-yúng é eq chí sân pyám byí é hui bekô nghut ri.

Ashop É Dông Gungsho Zùm Yap É Hkyô

¹² "Jung hkanmó kut râ ahkáng ngò wó lhê." Nghut kôlhang, jung hkanmó gi, akyû byí é a nghut. "Jung hkanmó kut râ ahkáng ngò wó lhê." Nghut kôlhang, haí jûng èq le ngo lé wó sing pyám râ a nghut. ¹³ "Zoshuq gi, wamdaú é matú nghut mù, wamdau gi, zoshuq é matú nghut ri." ga nungmoq ra-am tai kó râ nghut lhê. Nghut kôlhang, Garai Gasang gi, haú í jûng é lé lhoq htên pyám râ nghut lhê. Gungdu gi, ashop é dông gungsho zùm yap hkyo é matú a nghut é za, haú Yhumsing é matú nghut mù, haú Yhumsing gi, gungdú é matú nghut ri. ¹⁴ Garai Gasang gi, Yhâng é a-tsâm èq, haú

Yhumsîng lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê. ¹⁵ Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lhú? Haû nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lhú? Hkâ-nhám le a ge dut nhâng! ¹⁶ Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lhú? Hkâsu mù gâ le, "Yhangnhik gi, gungsho ralhum za dut kô râ nghut lhê." ✧ ga taî tô ri. ¹⁷ Nghut kôlhâng, haû Yhumsîng eq rading ralhum za dut é sù gi, woi-nyí má Yhang eq ralhum za dut bekô nghut ri.

¹⁸ Ashop é dông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhâng é gungdu shinggan má nghut lhê; nghut kôlhâng, ashop é dông gungsho zùm yap é hkyô kut shut é sù gi, yhumsîng gùng lé mara shut é sù nghut ri. ¹⁹ Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyí é Chyoiyúng Woi-nyí é noqkuq yhûm nghut é lé, nungmoq a sé kô lhú? Nungmoq gi, yhumsîng gùng lé sing é bang a nghut. ²⁰ Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luî, nungmoq é gungdû eq, Garai Gasang lé, hkunggâ é hkyô shit nyí keq.

7

Myî Yu É Eq Sêng É Hkyô

¹ Ahkuî, nungmoq kê kat é hkyô pé eq séng luî ga jang, yuqgè rayuq gi, myi a yu le gè ri.
² Nghut kôlhang, ashop é đông gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó râ lê; myiwe hkangmó gi, yhumsing é yuqgè wó râ lê. ³ Haû yhumsing hpó gi, wò joq é eq rajung za, yhâng yhumsing myhí eq zùm sháng gaq; haû đông za, yhumsing myhí le, yhâng yhumsing hpó eq zùm sháng gaq. ⁴ Haû yhumsing myhí é gungdu gi, yhânggùng yhang za sêng é a nghut, yhâng é yhumsing hpó eq le sêng lê. Haû eq rajung za, yhumsing hpó é gungdu gi, yhânggùng yhang za sêng é a nghut, yhâng é yhumsing myhí eq le sêng lê. ⁵ Nungmoq myit huî lhum luî, kyûdùng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán eq gunlaú é a hui kê sháng gaq, ahkyíng ayoq haû lai jáng, rahá dum zùm keq. ⁶ Ngò, haû su nghû taí é gi, hkunmó hkyô é đông a nghut, ahkáng byi kat é đông ru nghut lê. ⁷ Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuî, myiwe a yù lô é bang eq chuimó pé lé ngò taí kôlé, ngò su, haû đông jâng nyi pyám kê é nghut le, yhangmoq é matú ge é hkyô nghut ri.
⁹ Nghut kôlhang, yhumsing gùng lé a wó hkâng kê é nghut le gi, yhangmoq, myi yû myi ló râ lê; hkâsu mù gâ le, myi su nyé luî ô nau nyi râ malaî, myi yu

myi ló le je ge lhê.

¹⁰ Myi yû bê bang lé, ngò, hkunmó hkyó kôlé, shî gi, ngò dông hkyô é a nghut, Yhumsing chyáng mâ é ru nghut lhê: Yhumsîng myhí gi, yhâng é yhumsîng hpô chyáng mai a ge gang râ nghut lhê. ¹¹ Nghut kôlhang, yhang gâng é nghut jáng, myi a dum ló é za nyi râ lhê, haû a nghut jáng, yhâng é yhumsîng hpó eq dum xoq yû râ lhê. Yhumsîng hpó le, yhâng é yhumsîng myhí lé a ge kâng pyám râ nghut lhê.

¹² Góbang lé ngò shî su nghû taí kôlé, shî gi, Yhumsing chyáng mâ é a nghut, ngò dông mai taí é ru nghut lhê. Gumang rayuq yuq gi, lumjîng sû a nghut é yhumsîng myhí wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám râ nghut lhê. ¹³ Myiwe rayuq gi, lumjîng sû a nghut é yhumsîng hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê. ¹⁴ Hkâsu mù gâ le, haû a lumjîng sû yhumsîng hpó gi, yhâng yhumsîng myhí dông mai lhoq sân-yúng é hui bê nghut mù, a lumjîng sû yhumsîng myhí le, lumjîng sû nghut é yhâng é yhumsîng hpó dông mai lhoq san lhoq yúng é hui bê nghut ri. Haû a nghut jáng, nungmoq é zo wuî gi, a sanséng dut kô râ nghut lhê; nghut kôlhang, yhangmoq gi, haû dông mai, chyoiyúng bekô nghut ri.

¹⁵ Nghut kôlhang, haû a lumjîng sû gâng ló naû jáng gi, gâng ló sháng gaq. Lumjîng é yuqgè nghut nghut, myiwe nghut nghut, haû sû é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nguínón shoq nyi sháng gaq ga ji yû bê nghut lhê. ¹⁶ Yhumsîng myhí ê, náng

é yhumsîng hpó lé wó hkyi yù râ nghû, hkâsu wó sé râ l hú? Yhumsîng hpó ê, nâng é yhumsîng myhí lé wó hkyi yù râ nghû, hkâsu wó sé râ l hú?

¹⁷ Hká dông nghut kôlhang, yuq hkangmó gi, Garai Gasang, yhang lé ji yu tô é hkûn, haû Yhumsîng mai yhang lé nyi nhang tô é dông asak dui nyi râ lê. Haû gi, noqkuq hpúng pé banshoq má ngò tô to byí é tarâ nghut lê. ¹⁸ Byù rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huí é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lê. ²⁰ Yuq hkangmó gi, yhang lé Garai Gasâng èq ji yu é hkûn lê su xoq nyi nyi râ lê. ²¹ Nâng gi, ji yù huí é hkûn jùn dut nyi é l hú? Haú hkyô lé hkâ-myit chiq. Nghut kôlhang, nâng gi, luthkyô wó yu é nghut jáng, haû dông nyi aq. ²² Hkâsu mù gâ le, haû Yhumsîng èq ji yu é huí é hkûn, jùn dut nyi é sù gi, haû Yhumsîng èq lhoq lhut yu é byù nghut bê. Haû eq rajung za, ji yu é huí é hkûn, luthkyô wó é sù gi, Hkrisduq é jùn nghut ri. ²³ Nungmoq gi, Garai Gasâng èq ahpau byi mù wui hpyit yu é huí bê bang nghut akô. Haû mù, byu pé é jùn hkâdut kó. ²⁴ Gumang wui ê, yuq hkangmó gi, yhumsîng lé Garai Gasâng èq ji yu é huí to bê dông, Yhâng é hí má xoq nyi nyi râ lê.

²⁵ Ahkuí, zomyi zorâm wui é hkyô taí kôlé. Haû

Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sũ rayuq nghut nyi é dông, ngò, nungmoq lé hkyô shit râ nghut lhê. ²⁶ Ahkuí hui zô é wuĩhke hkyo é yanmai, nungmoq gi, yhumsing nyi to é su xoq nyi nyi le je ge ri nghũ, ngò wó myit ri. ²⁷ Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo. ²⁸ Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuĩhke hkyô pé myo myo hui kó rá nghut mù, ngò, nungmoq lé haũ mai hkyi yù nau ri.

²⁹ Gumang wuì ê, ngò taí nau é lichyúm gi, ahkýng tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq.* ³⁰ Yón ngaũ huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haũ mingkan zè pé lé chung é bang gi, haũ pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lhê é azông isâm gi, laí ló nyi é nghut lhê.

³² Ngò gi, nungmoq lé a myit myo nhâng nau. Myi a yù shí é sũ gi, haũ Yhumsing lé hkâsu wó gabú nhâng râ matú, haũ Yhumsing é muzó lé myit chiq nyi ri. ³³ Nghut kôlhang, myi yú bê sũ gi, yhâng é yhumsing myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁴ Haũ mù, yhâng shirong é myit gi, byo myín nyi

* **7:29** A wó é bang dông nyi kó sháng gaq gâ é gi, Garaí mù lé je myit zuq nyi sháng gá nau é nghut lhê.

ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsíng lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsíng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁵ Ngò, haú su nghû taí é gi, nungmoq é matú ge é hkyô nghut lhê; nungmoq lé tara eq zuí zing é a nghut é za, myit a byò lo shoq Yhumsíng lé wó ap nóng râ matú, jô é đông asak wó duí kô sháng gaq nghu é hkyô ru nghut lhê.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghû myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum râ lhê. ³⁷ Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô naù hkyo é ahkaú má a nghut é za, yhumsíng ô naù é hkyô lé wó hkâm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsíng hpó rû dui nyi nyi, yhang eq xoq tô ashî nghut lhê. Nghut kôlhang, yhâng é yhumsíng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haú yuq gi, Yhumsíng eq sêng é sù dut râ lhê. ⁴⁰ Ngò jéyáng é đông ga jáng, myi a dum

ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghû wó myit ri.

8

Hparà Lhò Lé Tíng Byî É Zoshuq

¹ Ahkuî, hparà lhò pé lé tíng byî é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ² Byù rayuq yuq gi, rajung jung lé sé bún é nghut le, yhang sé âng é lé lhang a sé shi nghut ri. ³ Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

⁴ Haú mù luí, hparà lhò pé lé tíng byî é zoshuq lé zô é eq séng luí gi: hparà lhò gi, mingkan má hái lhang a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê. ⁵ Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang ⁶ nga-nhúng é matú gi, Íwa nghut é Garai Gasang rayuq za nyi é nghut mù, lhungháng gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsîng rayuq za nyi é nghut mù, lhungháng gi, Yhang dông mai hpan é nghut luí, nga-nhúng gi, Yhang dông mai asak dui nyi é nghut lhê.

⁷ Nghut kôlhang, yuq hkangmó gi, haú hkyô lé sê gam hkoq yu é a nghut. Ra-am gi, ahkuî jé shoq hparà lhò pé má mán byuq kô é yanmai, haú sù é

zoshuq lé yhangmoq zô é hkûn, hparà lhô lé tîng byî é zoshuq dông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. ⁸ Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sôm byuq lô é a nghut, zô é nghut le gi, je ge lo é a nghut.

⁹ Haû su ga kôlhang, nungmoq a htung a htê zô é hkyô gi, lumjîng myit wum nyhôm bâng é matú myit leqbat jowò a dut shoq sidiq keq. ¹⁰ Hkâsu mù gà le, sumsé hpaqchyî wó é bang nungmoq gi, hparà lho é noqkuq yhûm má zô nyî kô é lé, haû myit sôn sê é hkyô má wum nyhôm é sû rayuq yuq myang é nghut jáng, hparà lhô pé lé tîng byî é zoshuq lé, yhang wám zo râ lé wum byî é a dut kó râ lú? ¹¹ Haû mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî èq lhoq htên pyâm é hui berâ nghut lhê. ¹² Nungmoq gi, haú hkyô dông mai, nungmoq é gumang wuì lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô. ¹³ Haû mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhông é Yhumsîng Yesuq lé myang wú bê sù, a nghut lú? Nungmoq gi, haû

Yhumsîng má, ngò zui saî é muzó é ashi pé chyat, a nghut kô lúhú? ² Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, haû Yhumsîng má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taî hung kat kôlé. ⁴ Ngamoq gi, zo râ shuq râ ahko ahkáng a wó é bang nghut lhê lúhú? ⁵ Gotû lagyô pé eq Yesuq é yhanggu yuqzô pé eq Kehpa kut é su, lumjîng sû nghut é yhumsîng myhí shuí chûng râ, ngamoq, ahko ahkáng a wó é nghut lhê lúhú? ⁶ Ngò eq Barnaba baú za, asak duì hkyo é matú mù zui ra râ lúhú?

⁷ Ó yuq wá, yhumsing zoshuq wùn luî, gyè mù wùn waq râ lúhú? Ó yuq wá, tsibiyiq hkyâm saî mù, haû mâ é tsibiyiq shi a zo kut râ lúhú? Ó yuq wá, sau rém mù, sau naú a shuq kut râ lúhú? ⁸ Ngò gi, shí hkyô pé lé xângzo hkyam dông za taî é nghut lhê lúhú? Haû tarâ má le, rajung za taî tô lhê, a nghut lúhú? ⁹ Hkâsu mù gâ le, haû Mosheq é tarâ má, "Guq nâng nyi é no lé nhuttsung hkâ-tsûng to byi." ✧ ga kâ tô ri. Garai Gasang gi, no eq séng luî za chiq é nghut lhê lúhú? ¹⁰ Gè gè yhang, yhang gi, nga-nhûng é matú taî é a nghut kô lúhú? Nghut lhê, haû gi, nga-nhûng é matú kâ to byi é nghut lhê. Haî mù gâ le, yò hpuq sù, yò hpuq é eq, guq bat sù, guq bat é gi, kyô chôm shù yù râ lé myoqbyù luî, kut kô é nghut lhê.

¹¹ Ngamoq gi, nungmoq chyáng woi-nyî amyui sân kat bê nghut mù, nungmoq chyáng mâ é mingkan zè lé shù yu é nghut jáng, lûm myô é dut byuq bekô lúhú? ¹² Góbang gi, nungmoq chyáng mai garúm é

✧ 9:9 Tarâ Pun 25:4

ahko ahkáng wó kô é nghut jáng, ngamoq gi, haú lé je wó râ lhê a nghut kó lú?

Nghut kôlhang, ngamoq gi, ahko ahkáng haú lé a yu é nghut lhê. Haú yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkgangmó lé ngamoq hkam jân nyi lhê. ¹³ Haú noqkuq yhûm má mù zuî é bang gi, yhangmoq é zoshuq lé haú noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byî é ra-am lé myàng zô é hkyô lé, nungmoq a sé kô lú? ¹⁴ Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haú Yhumsing hkunmó hkyô to bê nghut ri.

¹⁵ Nghut kôlhang, ngò gi, ahko ahkáng haú pé haî lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shî hkyô lé kê é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyám byi râ htoq má, ngò shi byuq le lháng je ge ri. ¹⁶ Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luî ap tô é lé, agon za wùn waq nyi é dut râ nghut lhê. ¹⁸ Haú mù luî, ngá é shigyaú chyunghuq gi, haî nghut lhê lú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luî, gabú danglù hko kyo hkyô mâ é ngá é ahko ahkáng pé lé ngò a

yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê. ²⁰ Ngò gi, Yudaq byu pé lé shuí lhing yù râ matú, Yudaq byu pê chyáng nghut nyi é hkûn, Yudaq byù rayuq dông dut nyi lhê. Ngò gi, tarâ hkaû má nyi sù a nghut kôlhang, tarâ hkaû mâ é bang lé shuí lhing yù râ matú, tarâ hkaû má nyi bâng chyáng nghut nyi é hkûn, tarâ hkaû mâ é byù rayuq dông dut nyi lhê. ²¹ Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq dông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê. ²² Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lhê. Ngò gi, wó dut é hkyô dông mai byù ra-am lé wó hkyi sháng gaq nghû, byù lhunglhang bâng chyáng, byù ajà jà dông nyi nyi lhê. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

²⁴ Din shingjóng poí má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú dìn keq. ²⁵ Sup poí má shingjóng lhùm é bang yuq hkangmó gi, yhumsing gùng yhumsing tarâ htan é dông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum

abyuq gingtîng nyi râ nghut é janmaú wó râ matú shikut é nghut lhê. ²⁶ Haú mù luí, ngò gi, jum dîn dîn é byù rayuq su dîn é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbâng chyáng mungdang hko é htâng má, ngá gûng ngò, shigyaú chyunghuq eq a gingdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lhê.

10

Israelaq Pé É Labaú Mai Sidiq Byî É Hkyô

¹ Gumang wuì ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhûng é îchyí îwa pé banshoq bang gi, mhutdûm ô má nyi mù, Nhông Nè mai wó lai byit kô é nghut lhê.* ² Yhangmoq banshoq bang gi, mhutdûm eq Nhông Nè má, Mosheq é chángzô pé dông bapisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wuì shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit

* **10:1** Bun zo ralhûm mai raxê lhûm gi, Htoq Ló Laiká má bo é Mosheq htâng cháng bâng é hkyô lé kâ tô é nghut lhê.

tuî nyî râ matú nga-nhông é azông dut bê nghut ri. ⁷ "Byu pé gi, zùng mù, zo luî shuq luî, a lumjng bang kut é dông, toq mù, ye bum akô." ✧ ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸ Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mún sum hkyíng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lhê. ⁹ Yhangmoq mâ é ra-am gi, haû Yhumsîng lé chyâm luî, lhangmuì pê èq hte sat é huì bùm kô é su, haû Yhumsîng lé, nga-nhúng gi, a ge chyâm râ nghut lhê. ¹⁰ Yhangmoq mâ é ra-am gi, nhutluq shô-myô kôluî, lhoq htên é maumâng èq sat pyâm é hui kô é su, nungmoq gi, nhutluq shô-myô hkâkut kó.

¹¹ Yhangmoq chyáng wú yû râ azông dông haú pé dut htoq luî, ló htáng râ ipyat pé má nyî âng to bang nga-nhông é matú sidiq byi râ dông kâ to bê nghut ri. ¹² Haû mù luî, nungmoq gi, yap gîng nyî bê su ngàm kô é nghut jáng, a leqbat râ matú sidiq nyî keq! ¹³ Byu chyáng htoq sê é gunглаú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunглаú hkyô lé hui nhâng râ a nghut. Nghut kôlhang, nungmoq gunглаú huì é hkûn, Yhang gi, haû lé nungmoq wó jan râ matú, hkyô htong byi râ nghut lhê.

Hparà Lhô Noq Hkyô Lé Koi Pyám Râ Hkyô

¹⁴ Haû mù luî, ngò chytđap é luzúm wui ê, hparà lô noq hkyô lé koi pyám keq. ¹⁵ Nhik gying bang lé

✧ 10:7 Htoq Ló 32:6

ngò taí lhê; ngò haí taí nyi é hkyô lé nungmoq gùng myit sôn yù keq. ¹⁶ Nga-nhúng, jeju bôn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lú? ¹⁷ Haí mù gâ le, muk htung ralhùm za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haú rahtung zâ é muk lé chôm gàm zô é bang chyat nghut lhê.

¹⁸ Israelaq byu pê é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lhê, a nghut kó lú? ¹⁹ Hparà lhô, a nghut jáng, hparà lhô lé tîng byî é hkungga gi, rajung jung nghut lhê nghû, ngò taí é lú? ²⁰ Haú su taí é a nghut, a lumjîng bâng é hkungga gi, Garai Gasang lé nhông byî é a nghut, nat gâng pé lé tîng byî é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹ Nungmoq gi, haú Yhumsing é góm lé le, nat gâng pê é góm lé le, ge shuq râ a nghut; nungmoq gi, haú Yhumsing é zangbó má le, nat gâng pê é zangbó má le, rahá ge bo lòm râ a nghut. ²² Nga-nhúng gi, haú Yhumsing lé manôn nhâng nau é bang dut râ a nghut kô lú? Nga-nhúng gi, Yhâng htoq je wúm bo é bang nghut lhê lú?

Lumjîng Su É Luthkyô

²³ "Jung hkanmó kut râ ahkáng wó lhê." nghut kôlhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôlhang, jung hkanmó gi, byù lé wó kô làm nhang

é a nghut.† ²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

²⁵ Sho ûng gài má ûng é haî lé lé, úng-âng é myit èq a myí gôn é za zo keq. ²⁶ Hkâsu mù gà le, "Myidàm htoq eq haú má joq é jung hkangmó gi, Yhumsing é chyat nghut lhê." ✧ gà tô ri.

²⁷ A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myí gôn é za, nungmoq hí má to byí é gû lé zo keq. ²⁸ Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit úng-âng é yanmai le, haú lé hkâzo kó. ²⁹ Úng-âng é myit haû gi, nungmoq é a nghut, góyuq é úng-âng é myit lé taî nau é ru nghut lhê. Ngá é luthkyô lé, haî mù góyuq é úng-âng é myit èq jéyáng é húi nhang lhê lhú? ³⁰ Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

³¹ Haû mù luî, nungmoq zo kôlhang, shuq kôlhang, haî kut kôlhang, Garai Gasâng é hpungwup shingkâng é matú chyat kut keq. ³² Ngò gi, yuq hkangmó lé, hkyô hkangmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gà le, ngò gi, yhangmoq hkyi yu é wó hui kó

† **10:23** Bun zo 23 mâ é dangngho gi, Korinhtuq byu pé lhaq taí é dang nghut lhê. ✧ **10:26** Hkya-on 24:1

sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bûn nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuî, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê. ⁵ Myiwe hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haû gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoî lhê nghut jáng, yhang gi, yhâng é ulhum lé nghop to ra râ nghut lhê. ⁷ Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop râ é nghut

lhê. Myiwe kúm gi, yuqge é hpungwup shingkang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. ¹⁰ Haû nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

¹¹ Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htunglí èq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zè đông yhang lé byî tô é nghut lhê. ¹⁶ Rayuq yuq, haû hkyô lé taî dang-rháng nau é nghut jáng, ngamoq chyáng le, Garai Gasang é noqkuq hpûng pé chyáng le, gotú htungli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô

✧ **11:8** Apûn 2:21-23

má hkyô shit tô é pé má, ngò, nungmoq lé hkyâ-ôn é a nghut. ¹⁸ Sâng-hi má, noqkuq hpúng ralhüm dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit rá matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zing kô é hkûn, nungmoq gi, haû Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haû mù, rayuq gi, zo mut huî nyî, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lhú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû táí kó râ lhú? Haú pè é yanmai, ngò, nungmoq lé hkyâ-on râ lhú? Ratsuí lháng a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsîng Yesuq gi, Yhang lé ap pyám huî é myîn má, muk lé yù mù, ²⁴ jeju hkyâ-ôn é htâng má, haû lé myhik hpé mù, táí é gi, "Shî gi, nungmoq é matú Ngá é gungsho nghut lhê; Ngo lé bûn nyî râ matú, shî su kut nyî keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyî râ matú shî su kut keq." gâ táí ri. ²⁶ Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû

Yhumsîng shî hkâm é hkyô lé, Yhang jé lé shoq, shit kyô nyî râ lhê.

²⁷ Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gùng yhumsîng jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê. ³⁰ Haû nghut é yanmai, nungmoq mâ é byù myo myo gi, wum nyhôm é, nòhpyo huî é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsîng hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haû Yhumsing èq jéyáng é hkûn, nga-nhúng gi, mhòqshit é huî nyî gù bê nghut lhê.

³³ Haû mù luî, ngá é gumang wuî ê, nungmoq gi, zo râ nghû rahá zup zîng é hkûn, rayuq eq rayuq láng lhum keq. ³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chùng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wuî ê, woi-nyí hkyô eq sêng é chyunghuq pé lé, nungmoq a sê gyo râ lé ngò

a ô nau é nghut lhê. ² Nungmoq gi, a lumjínq bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê. ³ Haû mù luí, "Yesuq gi, nhíng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyi é eq, haû Chyoiyúng Woi-nyí mai za a nghut jáng, "Yesuq gi, Yhumsíng nghut lhê." ga, ó yuq le a wó taí é nghut lhê nghú, nõ, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsíng rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haú pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkgámó lé byí bê nghut ri. ⁸ Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjínq myit byí é nghut ri; dum góyuq lé gi, Woi-nyí hau èq, nõ lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri. ¹¹ Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkgámó lé haú pé tsing gám byí é nghut

ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haù eq rajung za, Hkrisduq eq le haù dông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haù gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haù hkyî gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁶ Dum, haù nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? ¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lhú? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyî lé, "Ngò, nang lé a ra!" nghû a ge taí. ²² Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é dông rago nghop râ lhê. ²⁴ Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haû mù, gungdu má gamhkuî lhûm é hkyô a bo é za, gungsho showui showang pé ralhum eq ralhum, rajung za kut wó myit tê byî lhum kó râ nghut lhê. ²⁶ Haû gungsho showui showang ralhum jamjau huî é nghut jáng, lhum hkangmó bo jamjau râ nghut lhê. Ralhum hpautap huî é nghut jáng, lhum hkangmó bo gabú é nghut lhê.

²⁷ Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haû é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoî pé, sûm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuî-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lhê lhú? Banshoq bang gi, myiqhtoî pé nghut lhê lhú? Banshoq bang gi,

mhoqshit bang nghut lhê lhú? Banshoq bang gi, laklaí kumlhá kut akô lhú? ³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pê é lichyúm ge taí sân kyô lhê lhú? ³¹ Nghut kôlhang, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

13

¹ Ngò gi, byu pê é eq maumang lagyô pê é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. ² Ngò gi, myiqhtoi htoí é chyunghuq, zaú tô é hkyô pé banshoq lé sê gyô é nyan, sumsé hpaqchyî banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê. ³ Ngò gi, wó é sutzè banshoq myùng bang lé byî pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. ⁵ Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsing é nghut lhê. ⁶ Chyitdap myit gi, agè ashop é má a gabú é za, haú tengmán hkyô má gabú nyi ri. ⁷ Chyitdap

myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htûm byuq é a nghut. Myiqhtoi htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, laí ló byuq râ nghut lhê. ⁹ Hkâsu mù gâ le, nganhúng sê é gi, ra-am rahtâng ru nghut lhê. Nganhúng myiqhtoi htoî é gi, ra-am rahtâng ru nghut lhê. ¹⁰ Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹ Ngò, zoshâng nghut ashí hkûn gi, zoshâng đông dang taí, zoshâng đông myit, zoshâng đông myit sôn wú é nghut lhê. Ngò, suwún nghut jáng gi, zoshâng nyí yap hkyô pé lé tô pyám bê nghut lhê. ¹² Ahkuí, nganhúng gi, myoqjâm hkaû mã é rago a sân é wupzo lé za myâng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé rá nghut lhê.

¹³ Ahkuí, lumjíng myit, myit myoqbyù hkyô, chyitdap myit shi sôm lhum myit tô ri. Nghut kôlhang, haú pé mã é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyí keq. Myiqhtoi htoî é chyunghuq lé je riyhang myit

o nyi keq. ² Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri. ³ Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik tíng dang taí ri. ⁴ Laklaí dang rahû nyo é sù gi, yhumsing gùng lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri. ⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhòqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lú? ⁷ Htê lhoq htoq é asak a bo jung zè pé má lháng gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lú? ⁸ Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lú? ⁹ Nungmoq chyáng le haú đông nghut lhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lú? Nungmoq gi, maulat má za taí hâng

pyâm nyi kó râ nghut lhê. ¹⁰ Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haû mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haû dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haû noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haû nghut é yanmai, laklaí dang ahú hú taí é sù ó yuq le, yhang haû taí é lichyúm wó taí sân kyo sháng gaq, kyûdung râ dut lhê. ¹⁴ Hkâsu mù gâ le, laklaí dang ahú hú dông ngò kyûdông é nghut jáng, ngá é woi-nyí mai dông é nghut lhê; nghut kôlhang, ngá é myitnyân é matú, hai akyû a wó nghut ri. ¹⁵ Haû mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lhú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

¹⁸ Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklaí dang rahû dông danghkun ramun ngò taí râ

htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

²⁰ Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq. ²¹ Haû jep é tarâ má kê tô é gi,

"A wó gyô wú é dang dông mai le, góming byu pè é nhutwuì dông mai le, byù shí bang lé ngò taí râ nghut lhê;

nghut kôlhang, yhangmoq gi, ngá dang gyo kó râ a nghut.'

ga Yhumsîng taí ri."✧

gâ ri.

²² Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lhê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lhê. ²³ Haû nghut mù, noqkuq hpúng gón chôm zing mù, yuq hkgangmó laklaí dang ahú hú nyò kê é nghut jáng, a sê gyô é bang nghut nghut, a lumjîng é bang nghut nghut, wang lé kê é hkûn, yhangmoq gi, nungmoq nâ bùm bekô ga a taí kó râ nghut lhê lú? ²⁴ Nghut kôlhang, yuq hkgangmó, myiqhtoi dang taí nyi é u má, a lumjîng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyîng é hui râ eq, banshoq èq jéyáng é hui râ nghut é htoq agó, ²⁵ yhâng é i-myit má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luí,

✧ 14:21 Esai 28:11-12

Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haú jáng, gumang wui ê, nga-nhúng haí taí râ lhú? Nungmoq rahá lé chôm zîng é hkún, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyò râ dut é htoq agó, rayuq yuq haú lé taí sân kyo ra râ dut lhê. ²⁸ Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. ³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. ³¹ Hkâsu mù gâ le, yuq hkangmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. ³² Haú myiqhtoí pé é woi-nyí pé gi, myiqhtoí pé uphkanq é a-ô má nghut nyi ri. ³³ Hkâsu mù gâ le, Garai Gasang gi, atau ahú dut é Garai Gasang a nghut é za, nuingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, ³⁴ myiwe wùi gi, noqkuq hpúng pé má zim za nyì râ dut lhê. Yhangmoq gi, dang taí ahkáng a wó é nghut mù, haù jep é tarâ má bo é eq rajung za a-ô má nyì kó sháng gaq. ³⁵ Yhangmoq gi, rajung jung sé naù kô é nghut jáng, yhùm má yhangmoq é yhumsing hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahî hkyô nghut ri.

³⁶ Haù Garai Gasâng é mungdang gi, nungmoq chyáng mai htoq lo é nghut lhê lhú? Haù gi, nungmoq chyáng za lé jé bè nghut lhê lhú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haù Yhumsing é hkunmó nghut é lé, yhang sê yù sháng gaq. ³⁸ Yhang gi, haù lé haì su a ngàm kut é nghut jáng, yhânggùng le, haì su a ngàm kut é hui zo râ nghut lhê.

³⁹ Haù mù luí, ngá é gumang wùi ê, myiqhtoi htoi râ lé ô nau nyì mù, laklaí dang ahú hù nyo é lé hkâhkùm pyám kó. ⁴⁰ Nghut kôhang, jung hkanmó gi, htuk é dông eq shuq shuq tap tap zâ é hkyô dông kut é dut râ lhê.

15

Hkrisduq É Dui Toq Hkyô

¹ Gumang wùi ê, ngò, nungmoq lé hko kyo bê nghut mù, nungmoq le hap yù luí, nungmoq yap gíng tô é jowò nghut é gabú danglù hkyô lé, ahkuí, ngò, nungmoq lé lhoq pûn kat nau ri. ² Ngò, nungmoq lé hko kyo bê é mungdang lé, nungmoq

ging ging myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haú a nghut jáng, nungmoq lumjínq é gi, akôm dut bê nghut lhê.

³ Ngò hap yu tô é pé lé, sâng-hi ahkyak é đông, ngò, nungmoq lé lhai byi bê nghut lhê. Haú pé gi: Chyúmdang eq rajung za, Hkrisduq gi, nga-nhùng é yubak marâ é matú shî hkám byi bê gâ é nghut ri; ⁴ Yhang gi, myhup yhùm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit luí, haú lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haú bang má é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htâng má, Yhang gi, hkú buinyi a jé shî é má hku é đông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyo pé mâ é tiq dik sù nghut lhê. Haú Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghu râ lhang a gingdán é sù nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haú mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjínq é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó taí kó râ lúh? ¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínq hkyô gi, akôm dut byuq râ nghut lê. ¹⁵ Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut. ¹⁶ Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjínq hkyô gi, akôm dut lûi, nungmoq gi, nungmoq é yubak mara hkaû má ru nyi nyi shi kó râ nghut lê. ¹⁸ Haû nghut jáng, Hkrisduq má shi ló byuq bê bang le, htên byoq byuq râ za nghut lê. ¹⁹ Nga-nhúng gi, shí ipyat lê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shî-nò hkyô gi, byù rayuq dông mai lò bê nghut

é eq rajung za, shi byuq bâng é dui toq hkyô le, byù rayuq dông mai lo é nghut lhê. ²² Hkâsu mù gâ le, lhunglhâng bang gi, Adam é yanmai shi byuq é su, lhunglhâng bang gi, Hkrisduq eq rading ralhum za nghut é yanmai lhoq dui toq é hui râ nghut lhê. ²³ Nghut kôhang, yuq hkanmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sú nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. ²⁴ Hau htâng, jihtûm jé râ nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Îwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. ²⁶ Haú lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkanmó lé, Yhâng é hkyî wang ô má tô pyám bê nghut ri."* gâ Chyúmdang má kê tô ri. "Jung hkanmó lé" Yhâng é a-ô má tô pyám bê ga tái é hkûn, jung hkanmó lé Hkrisduq é a-ô má tô pyám bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haú hkyô ban kut é htâng má, haú Zo yhang le, jung hkanmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhâng htoq má gyaú sù nghut luí, lhunglhâng lé sîng sù nghut râ nghut lhê. ²⁹ Dui toq hkyô a joq é ru nghut le gi, shi byuq bê bâng é matú wui-myhup hkâm byi bùm kô é gi,

* 15:27 Hkya-on 8:6

hai akyû bò kó râ lú? Haû shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkâm yù kó râ lú?

³⁰ Ngamoq gi, ngamoq é matú, hkyíng hkanmó haí mù chiq râ jowò má nyi râ lê lú? ³¹ Gumang wui ê, ngò gi, nyí wui aluq shoí shoí shi é hui zô é nghut lê. Haû su nghû é gi, nga-nhûng é Yhumsíng Hkrisduq Yesuq má, nungmoq é hkyô lé ngò hkyak wó gumrong é yanmai nghut lê.

³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lú? Shi byuq bang lhoq dui toq é a hui é ru nghut le gi,

"Nga-nhúng gi, napmá shi râ nghut é yanmai, zo sháng, shuq sháng."[☆]

ngû râ za nghut lê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lê." gâ é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lê.

Dui Toq É Gungdu

³⁵ Nghut kôhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lú? Yhangmoq gi, hkasû é gungdu nghut kó râ lú?" ga myi râ nghut lê. ³⁶ Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaí. ³⁷ Nàng, kyô hkyô

[☆] 15:32 Esai 22:13 * 15:32 Dang ngho shi gi, a lumjíng bang taí é dang nghut lê.

é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byi ri. ³⁹ Gungsho lhunglhang gi, rajung za a nghut. Byù pê é gungsho gi, rajung, dusak pê é gi, gó jung, nghoq pê é gi, gó jung, ngozo pê é gi, gó jung ru nghut lhê. ⁴⁰ Mauhkûng gùng pé le joq é nghut luî, myidam gùng pé le joq ri; nghut kôlhang, mauhkûng gùng pé é shing kang gi, rajung, myidam gùng pê é shing kang gi, gó jung ru nghut lhê. ⁴¹ Haû bui má bo é shing kang gi, rajung, lhamó mâ é gi, gó jung, kyî pé mâ é gi, gó jung ru nghut lhê; kyî racham eq rachâm é shing kang le gotû tû shai lhûm lhê.

⁴² Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luî, lhoq dui toq huî é gungdu kúm gi, htên byoq a sê é nghut lhê.

⁴³ Hô hkyô kat é hkûn gi, aróng a bò, lhoq dui toq huî é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri. ⁴⁴ Gungsho gungdu gi, hô hkyô é huî mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sâng-hi yuq byù Adam gi, asak dui é xângzo dut bê nghut ri."* ga kê tô ri. Haû ló htâng é Adam

* 15:45 Apûn 2:7

kúm gi, asak byî é woi-nyí nghut ri.† ⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidàm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri. ⁴⁸ Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

⁵⁰ Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. ⁵² Haû gi, ló htâng é tut htê mying é hkûn, ralháp za, myoqkuq raláp má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. ⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é

† 15:45 Ló htâng é Adam gi, Yesuq lé taí nau é nghut lhê.

hui bê nghut ri."✧ ga kê tô é eq,
⁵⁵ "Shî-nò hkyô ê, náng é ùng budang gi, hkâmá l hú?
 Shî-nò hkyô ê, náng é nyin gi, hkâmá l hú?"✧
 gâ tô é sanghkyang gi, dik râ nghut lhê. ⁵⁶ Haû
 shî-nò hkyô é nyin gi, yubak mara nghut ri; yubak
 marâ é a-tsam gi, jep é tarâ nghut ri. ⁵⁷ Nghut
 kôlhang, Garai Gasang lé jeju hkya-ôn lhê! Yhang
 gi, nga-nhông é Yhumsîng Yesuq Hkrisduq dông
 mai, nga-nhông lé ùng budang byi é nghut ri.

⁵⁸ Haû mù lui, ngá é chyitdap gumang wui ê, yap
 gingting nyi keq. Hai eq le, nungmoq lé hkâlhoq
 dui nún nhâng kó. Nungmoq gi, haû Yhumsîng má
 nungmoq wùn waq é muzó akôm a nghut é lé sé
 kê é nghut lhê yanmai, haû Yhumsîng é muzó lé
 ayang wùn waq shikut nyi keq.

16

Yerusalem Wà Mó Mã É Lumjîng Bâng É Matú Alu Hkyuî Râ Hkyô

¹ Ahkuî, Garai Gasâng é byu pê é matú alu hkyuî
 râ hkyô eq séng lui gi, haû Galatiq mau mã é
 noqkuq hpûng pé lé ngò kut nhang é su kut keq.
² Ngò jé lé é hkûn, alu hkyuî râ hkyô a kut ra
 râ dông, bat hkgámó mã é sâng-hi nyi má, yuq
 hkgámó gi, yhumsîng wó ho é mã cháng mù, gam
 tô to láng keq. ³ Ngò jé lé é hkûn, ngò gi, nungmoq
 hkyin tô é byu pé lé, shit kyô é laiká pé byi mù,
 nungmoq é chyunghuq lé, Yerusalem wà mó mã é
 dé nhâng râ nghut lhê. ⁴ Ngò le ê ang râ dut é nghut
 jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau laî byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laî byit râ za nghut lhê. ⁶ Ngò hkâmá ê kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gyoqmyò lháng lai shoq nghut nghut, nungmoq eq rahá nyi abe. ⁷ Ngò gi, laî ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. ⁸ Nghut kôlhang, ngò gi, Penteko-ti poî buinyi jé shoq Ehpesu myuq má nyi râ nghut lhê. ⁹ Haî mù gâ le, ngo lé htuq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê.

¹¹ Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowuî má nuingón é dông nhang kat keq. Haû gumang wuî eq rahá lò kó râ lé, ngò myit láng nyi lhê.

¹² Ahkuî, nga-nhûng é gumang Apolo é hkyô eq séng luî ga jang: yhang gi, haû gumang wuî eq rahá nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dê bò shi, nghut kôlhang, yuqyo é ahkýing wó jáng, yhang lé lô râ nghut lhê.

¹³ Machya nyi keq; lumjîng hkyô má ging ging

tíng tíng yap nyì keq; gyuq kyum myit hkâbô kó; wum bo nyì keq. ¹⁴ Jung hkanmó lé, chyitdap myit eq zui saí keq.

¹⁵ Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luì, yhangmoq gi, yhumsîng gùng lé, haù sâng-yúng bâng é dojaù hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taí tsuq kat kôlé, ¹⁶ haù sù é bâng é a-ô má le, haù muzó má bo wang lòm mù, mù zui shikut bang yuq hkanmó é a-ô má le, nyì keq. ¹⁷ Ngò gi, Stehpana, Hportunatu eq Ahkaiku pé jé lo é hkún, gyai gabú é nghut lhê, haì mù gâ le, yhangmoq gi, nungmoq a kut byì é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haù sù é bang lé, hpautap nyí keq.

Ló Htâng É Shi-kyâm Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chôm huì é noqkuq hpúng lé, haù Yhumsîng má nungmoq lé gyai yhang shi-kyâm kat akô. ²⁰ Shí má nyì é gumang wuì banshoq bang gi, nungmoq lé shi-kyâm kat akô. Rayuq eq rayuq chyoyúng é chyitpuq èq shi-kyâm lhum keq.

²¹ Ngò, Poluq gi, shi-kyâm dang shì lé, ngá é loq èq yhang ká é nghut lhê.

²² Rayuq yuq, haù Yhumsîng lé a chyitdap é nghut jáng, haù yuq gi, nhîng pyâm é hui sháng gaq. Yhumsîng ê, jé lé aq hkoi!

²³ Haù Yhumsîng Yesuq é jeju gi, nungmoq eq rahá nghut nyí sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee